

PWUHK EN KAWOID OHNG

PENEINEI

PWUHK EN KAWEID OHNG

PENEINEI

Ntingdahr sang  
Mwomwohdiso en Sises Kraiss en Souleung en Imwin Rahn akan  
Salt Lake City, Utah

© 2001 sang Intellectual Reserve, Inc.  
Pwuhng Koaros Alahldier  
Ntingdahr nan United States of America

Kamanaman ohng Lokaiahn Wai: 11/99  
Kamanaman ohng Kawehwe: 11/99  
Kawehwehpen *Family Guidebook*  
Pohnpeian

# Audepe Kan

---

“Peneinei: Kalohk Ehu Ohng Sampah”	v
<hr/>	
Koasoandi oh Kahrepen Peneinei	1
Koasoandi	1
Kahrepe	4
<hr/>	
Padapadahki Rongamwahuo ni Ihmw	5
Onop en Pwuhk Sarawi nan Peneinei	6
Pein en Emen Emen oh Peneinei Kapakap akan	7
Pein en Emen Emen Kapakap	7
Kapakap en Peneinei	8
Kapakap Kesempwal Teikan	8
Kasarawiala Kisintungoal	8
Soutik en Peneinei Ihmw	8
Rahn en Kommol oh Kapokon Kesempwal Akan	10
Daiding oh Meirong Kan	11
Koasoakoasoaipene Kan ni Ansoun Mwenge	11
Soai Akan en Ansoun Meir	11
Ehukipene doadoahk	12
En Peneinei Koasoakoasoaipene Kan	12
Kapeidek Rir Akan	12
Mwekid Akan en nan Peneinei	13
<hr/>	
Pwukoah me Keieu Kesempwal kan en Priesthood	14
Anahn en Palingehn oh Paliwar	14
Anahn en Palingehn	14
Anahn en Paliwar	14
Kalohki Rongamwahuo	16
Tiahk Sarawi kan en Nan Tehnpas Sarawi ohng me Momour oh Me Melahr akan	17
<hr/>	
Kaiahn en Kawekaweid	19
<hr/>	
Peneinei ni eh wia Unit en Mwomwohdiso	20

Tiahk Sarawi Kan oh Kapai Kan en Priesthood	22
Kiheng Eden Seri kan oh Kapai Irailda	23
Pepdais	23
Kasarawi en Towehla	24
Pwildien ohng Priesthood oh Kasarawiheng nan ohpis kan en Priesthood	24
Kamadipw Sarawi	25
Kapakapki me Soumwahu	27
Kasarawiala Leh	27
Keiehdi me Soumwahu	27
Keiki Leh	27
Katengehdi Aramas Keidio	28
Kapai en Pahpa oh Kapai Teikan en Kapohl oh Kaweid	28
Kasarawihpen Seridi	29

# “Peneinei: Kalohk Ehu Ohng Sampah”

---

Nan 1995, Presidency Keieuo oh Irail Wahnparon Ehk-Riemeno kadarpeseng Peneinei: Kalohk Ehu Ohng Sampah.” Kalohk wet wia kair oh inou manaman en doctrine oh dahnge kan me en wiawi me soukohp akan kin wie kalokalohki-seli nan poadoapoad en Mwomwohdiso. E audaudkihda kosonned akan me inenen kesempwal ohng onepek mwahu oh meleilei en nan ehu ehu peneinei. Tohn peneinei kan uhdahn pahn sukuhlki kalohk wet oh pil pahn uhdahn mourki audepe kan.

---

“Kiht Presidensi Keieu oh Kaunsel en Wahnpoaron Ehk-Riemeno en Mwomwodiso en Sises Kraiss en Souleng en Imwin Rahn akan, ni wahu patohwan kalohki me pwo-pwoud nanpwungen ohl oh lih emen iei ihme Koht ketin kasarawialahr oh me peneiei iei ih me keieu kesempwal ohng nan sapwellimen sounkapiki-piko pilahn ohng sapwellimen Koht serihkan en ahniki mour soutik.

“Aramas koaruhsie - ohl de lih - wia-widahr ni mwomwen Koht. Emen emen pwutak oh serepein ngehn akan me wia sapwelimen Sahn oh Ihn nanleng me re kin ketin loloale. Oh pwehki met, emen emen kitail sohsokihier mwomwen Koht oh kak duwehla ih. Ohl de lih iei mwohmw me kesempwal me wia kahrepe oh kasalepen emen emen nan mour mwohn mouren sampah, mouret oh nan mour kohkohlachte.

“Nan wehio mwohn mouren sampah wet, sapwellimen Koht pwutak oh serepein ngehn akan kin ese oh pwohngih Koht nin duwen samarail

soutuk oh aledahr sapwellime pilahno me sapwellime seri kan en kak alehdi paliwar oh alehdi kekeiradahn mour en unsekla oh alehdi mour soutuk rehn Koht nin duwen emen me kin sohsokhi mour soutuk. Sapwellimen Koht pilahn en peren kahreiong ehu-pene en nan peneinei kan en pepeusla te mwurin mehla. Tiahk oh inou sarawi kan me miehier nan tehnpas sarawi kan kin kahreiong emen emen en kak pwurelahng rehn Koht, oh peineinei kan en kak ehupene kohkohlachte.

“Kosonned keieu me Koht ketikihongehr Adam oh Ihp pid duwen ira en kak wiahla pahpa oh nohno nin duwen pwo-pwoud ehu. Se patohwan kalohki me sapwellimen kauno kosonned ong sapwellime seri kan en katohtohla oh kadirehla sampah en wie doadoakte. Se pil patohwan doula oh kalohki me Koht ketin poarenehier me manaman sarawi kan me wiawidahn aramas en doadoahkete nanpwungen ohl oh lih me kapwopwoud nin duwen kosonned en wiahla pwo-pwoud ehu.

“Se patohwan kalohki me ahl en mour en sampah wet wiawidahr sang ni koasoandi en Koht. Se uting ni kehlail duwen mour eh sarawi oh duwen kesempwal en mour nan sampwellimen Koht pilahn soutuk.

“Ohl oh lih pwopwoud men ahneki pwukoah sarawi en poakpene oh epwelpenehn nan pwungara oh neira seri kan. Seri kan iei ehu sohso sang rehn kauno ( Ps. 127:3). Pahpa oh nohno kan ahniki pwukoa sarawi en kairada neirail seri kan ni limpoak oh ni pwung en kieng anahn akan en paliwar oh palingehn, padahkihong irail en poakpene oh papah emen emen, en kapwaiada kosonned akan en Koht oh en wia towe mehlel akan me kin peikihong kosonned en wasa koaros me re kin kousoan ie. Ohl oh lih pwopwoud akan - nohno oh pahpa kan - pahn pwukoahki mwohn Koht duen apwali pwukoah pwukat.

“Peneinei eu wia kapikipik sarawi en Koht. Pwopwoud nanpwungen ohl oh lih emen iei me wia kisehn poahson en sapwellime pilahn soutuko. Seri kan ahneki pwung en ipwisang pahpa oh nohno me wie pwopwoud nin duen kosoned, oh en epwelda sang pahpa oh nohno men me kin kapwaiada inou en pwopwoud kan ni loalepwoat unsek. Peren nan mour en peneinei pahn kin keieu kak alahldi ni ansou me mour en peneinei pahn pawsoanda sang padahng kan en Kaun Sises Kraiss. Pwopwoud oh peneinei kan me pweida kin poahsoanda oh epwelda

sang ni koasondih kan en pwoson, kapakap, koluhla, mahk, wahu, limpoak, poakehla, doadoahk, oh kamwadong mwau kan. Sang ni koasoandien Koht, pahpa kan en mongehda arail peneinei kan ni limpoak oh pwung oh en pwukoahki koadoahkehda anahnepen mour oh mehn doarepen arail peneinei. Keieu pwukoah kesempwal en nohno kan iei apwailiada neirail seri kan. Nan pwukoah sarawi pwukat, pahpa oh nohno kan en sawaspene nin duwen ara ehupene ni pahrek. Soumwahu, mehla, de soangen irair teikan pahn kak kahrehiong wekidek en pwukoah. Peneinei kan pahn kin sawas ni ansou me mie anahnepe.

“Se patohwan kapariki me emen emen irail akan me kauwehla inou sarawi kesempwal en mwakelekel, en pwopwoud me wiakauwe arail pwoud oh neirail seri kan, de sohte kapwaiada pwukoah kan en peneinei, pahn ehu rahn pwukoahki mwohn Koht. Se pil patohwan doula mwowe kapariki me olahn peneinei pahn wadohng emen emen, pwihn en aramas akan, oh wehi kan paisuwed me soukohp akan en keilahn aio oh ansou wet kohpadahr.

“Se patohwan panginiki tohn wei mehlel kan oh irail soun papah en government kan en wasa koaros en wia arail pwukoah en kairada irair akan me wiawidahr pwehn apwialiala oh kakehla kala peneinei en wia poahsoan kesempwal en pwihn ehu.” (*Ensign*, Nov. 1995, 102).

# Koasoandi oh Kahrepen Peneinei

---



## Koasoandi

Peneinei iei unit me keieu kesempwal nan Mwomwohdiso en Sises Kraiss en Imwin Rahn Akan oh iei pwihn me keieu kesempwal nan irair en mour wet oh pil kokkohahte erein. Koht ketin wiahda peneinei kan pwe irail en wadohng popohl rehn Sapwellime seri kan, mweidehng irail en wehwehkihla kosonned pwung kan nan wasa me mie onepek mwahu, oh kaunopirailda ohng mour soutik.

Ni ihmw iei wasa me keieu mwahu en wia kasukuhlpen, wehwehkihla, oh doadaohngki paddahk mehlel

akan en rongamwahu. Iei wasa wet me emen emen kin esehla sawaskihda mwenge, likou, ihmw, oh soangen anahn teikan. Pahpao, sang ni sawas en nohno, uhdahn pahn sewese oh apwalih emen emen tohn peneinei.

- Rapahki da me mehlelo oh kakairada pwoson rehn Koht.
- Koluhkihla dihp akan, pepdaisla pwe en alehdi mahkpen dihp akan, towehla Mwomwohdiso en Sises Kraiss en Souleng en Imwin Rahn Akan, oh alehda Ngehn Sarawi.
- Kapwaiada kosonned akan en Koht, onop ire kan nan pwuhk sarawi ni



loaloapwoat, kapakap rahn koaros, oh oh sewese aramas teikan.

- Ehukihong mehteikan rongamwahuo.
- Alehda endowment oh kopwopwoula nan tehnpas sarawi oh wiahla werék warohng lella erein mour, koadohkehda ahn peneinei wasahn kousoan me onepek mwahu, oh sewsehki peneinei limpoak oh tohnmetei.
- Ropada ire kan me pid irail tohn peneinei me melahr akan oh alehda tiahk sarawi kan ohng irail.
- Sawaskihda soahng kan me anahn ohng palingehn, mour, paliwar, oh roson mwahu en lamalam.

Pahpa men me kolokol priesthood wia ohpisehr me keieu kesempwal nan Mwomwohdiso. Iei ih me moange de peidriark en peneinei (wadek Episod 5:23). Ni eh wia kaun en priesthood nan ah penieni, ih me wia sounkaweid nan ah peneinei, kaunda peneinei oh pwukoahki kasukuhlieki, kasarawiala, oh sawaskihda anahn akan ohng mour en peneinei. Ih me kahluepen peneinei pwe irail en kak kaukaunop pwurala rehn Samatail me ketiket Nanleng. Ah liho iei ah werék me keieu kesempwal, ienge, oh sounkaweid. Ohlo oh liho uhdahn pahn sawaspene oh kaweid soahng koaros

me pidada peneinei oh wasahn kousoan.

Pahpao me pahn sawaskihda anahn ohng palingehn en ah peneinei. E uhdahn pahn tehk mwahu me irail ale kasukuhlpén pwuhk sarawi en Sises Krai oh pahn uhdahn wia uwen eh kak koaros en kangonge irail oh sewese irail pwe irail en peikieng konnaed akan en Kauno.

Pahpa warohng oh konehng men nan Mwomwohdiso kak alehdi priesthood, me iei manaman oh mweimwei en Koht. Sang ni manaman oh mweimwei wet, pahpao pahn kak wiahla kaun en priesthood en ah peneineio. Pahpa men me kolokol pwukoah en priesthood kak kasarawiala tohn ah peneineio oh sewesehieng irail arail anahn akan en palingehn. Sang ni manaman en priesthood oh mweimwei manaman sang kaun en priesthood, pahpao kak:

1. Kiheng eden seri kan oh kapaiada irail.
2. Pepdaisiala seri kan oh aramas teikan.
3. Kasarawiala seri kan (oh mehteikan) me towe Mwomwohdiso oh kihong Ngehn Sarawi.
4. Pwilikihdi priesthood pohn nah pwutak kan (oh mehteikan) oh ka-

sarawihiraila ohng pwukoah kan nan priesthood.

5. Kasarawiala oh kihda kamadipw sarawi.
6. Kasarawiala seridi ni sousou.

Ni sohte mweimwei sang kaun en priesthood, pahpa men kak kasarawiala leh oh kapaiada irail kan me towe ah peneinei oh mehteikan ni ansou me re soumwahu oh kiheng irail kapai tohrohr teikan nan ansou tohrohr akan me anahneperail pahn kin pwarada. (Wadek page 22–29 nan pwuhk en kaweid wet ohng wiepen apwalih tiahk sarawi kan en priesthood oh kapai kan.)

Papaho me pahn tetehk pwe ah peneinei en ngoangki oh iang doadoahngki pwukoah kesempwal siluh kan en priesthood:

1. Kaunopdahn palingehn oh paliwar en emen emen oh ah peneinei.
2. Kalohki rongamwahu.
3. Poadoapoad en peneinei oh tiahk sarawi kan en tehnpas sarawi ohng me momour oh me melahr akan.

Nohno me ahniki kapai en naitikiedi oh kakairada seri kan. E wia ahn ah pwoudo werek oh sounkaweid en ah pwoudo. E pahn kin sewese ohlo oh kasukuhlieki neira seri kan kosonned

akan en Koht. Ma sohte pahpa ni ihmw, nohno me pwukoahki epwel-pen peneinei.

Pahpa oh nohno uhdahn pahn wia ehu ni pwukoah. Ara mehn kairoir iei en kaunopada koaros me towe peneinei pwe ren pwurala rehn Sahn Nanleng. Ira uhdahn pahn ehupene oh doadoahkalang anahn wet. Kauno ketin kauwadahr Mwomwohdiso mehn sewese pahpa oh nohno kan ren kasukuhli oh apwalih arail peneinei kan.

Ni ansou me seri kan ipwidieng nan peneinei, pahpa oh nohno kan uhdahn pahn poakehng irail, kasukuhleiki seri kan mehlel kan en rongamwahu, oh wia mehn kahlamangi mour me pwung. Seri kan pahn sukuhlki oh kolokol kosonned akan en Koht. Irail pahn wahuneki oh kahkahki samarail oh inarail kan.

Kehlail en Mwomwohdiso mih rehn peineinei kan oh emen emen me kin momourki rongamwahu en Sises Krai. Uwen ahn ehu peneinei eh kin nsenamwahuki kapai kan en rongamwahu kin kohsang ni mehlel en uwen ahn nohno oh pahpa wehwehki oh doadoahngki ara pwukoah kesempwal kan ni ara wia pahpa oh nohno. Mwomwohdiso sohte kin kiheng pahpa oh nohno kan koasoandi oh pwukoah kan me pahn lepeiraila de

kihong irail peikasal de kahrehieng arail pohnsewehla pwukoah kesempwal pwukat.

---

## **Kahrepe**

Pwehki Samatail me Ketiket Nanleng ketin poakehng kitail, E ketin kupwurki kital en pil lapalapala due Ih. Pwe en kak ketin sewese kitail, E ketin ketkihong kitail koasoandi me poahsoankihda kosonned sarawi kan en mehlelo pwe kitail en idawehn. Irail kan me pahn wehwehkihla koasoandio oh idawehn ni mehlel pahn kak duwehla Samatail me ketiket Nanleng oh perepereniki mour me E kin ketin kerekeremwehki.

Kisehn koasoandi wet iei kitail en koksang nanleng oh kohdo ni sampah wet. Wasaht kitail alehda paliwar oh kekeirda sang ni soahng kan me kitail lellohngehr, oh kadehdehda me kitail warohng pwurehng mour rehn Koht. Kitail kin kadehdehda me kitail warohng sang ni saledek en pilada pwehn kolokol Sapwellime kosonned akan. (Wadek Abraham 3:23-25; 2 Nephi 2:27)

Pwe kitail en kak kaonopada pein kitail ohng komourla Reh, Samatail Nanleng ketin wiahkinkitaildahr peneinei kei. Peneinei kan pohn sampah wet duehte atail peneinei kan me kitail kak ahniki nan wehin Selestiel.

# Padapadahki Rongamwahuo ni Ihmwo

---



Kauno ketin panginiki pahpa oh nohno kan en kasukuhlieki neirail seri kan duen rongamwahuo. E ketin mahsanih:

Ma mie nein sahm oh ihn akan seri nan Sion, de nan ehu ehu stake kan me kokoudahr, me ma re sohte pahn kasukuhlieki neirail kan en wehweh-kihla rongmwahu en kaluhlao, pwo-son Krai Sapwellimen Koht Ieiaso, oh pepdais iangahki kisakis en Ngehn Sarawio me kin sang ni kasarawi en pwilidi en peh kan, ni ansou me irail lel sounpar walou, dihpo pahn uhd

mihla pohn moangen pahpa oh nohno kan. Pwe met pahn iei kosoned ohng irail kan me towe Sion, de nan ehu ehu stake kan me kokoudahr.

Neirail seri kan uhdahn pahn pepdaiskihla lapwepen diparail kan ni arail pahn lel sounpar walou, oh alehdi kasarawi sang ni pwilidi en peh kan. Oh nohno oh pahpah kan uhdahn pahn pil kasukuhlieki neirail seri kan ren kapakap, oh weweidwei ni pwung mwohn Kauno (kilang D&C 68:25–28).

## **Onop en Pwuhk Sarawin nan Peneinei**

Kitail kak duwehla Samatail Nanleng oh perepereniki soangen mour me E kin ketin kerekeremehliki ihte ma kitail kolokol kosonned akan me kapao poasoandahsang (Wadek D&C 130:20–21). Mwohn atail pahn kak momourki kosonned oko, kitail

uhdahn anahne wehwehkihla mengihtikirail kan. “E apwal ohng aramas emen en komourla ma e rot” (Wadek D&C 131:6).

Sises Kraisis iei kahluapatail oh sounketikihdo kosonned. E ketin mwahngih ahlo oh kosonned akan me kitail en tamataman, oh E ketin luke emen emen kitail en idaweihn Ih. E ketin mahsaniih “Ngehi me ahl, ngehi me mehleh, ngehi me mour; sohte me kak kolahng Semei ma soh ngehi” (Sohn 14:6). Pwe en duwehla Samatail Nanleng oh pwurala Reh, kitail anahne uhdahn wehwehkihla Sapwellimen Sises padahk kan oh idaweihn. Mie rehtail iren pwuhk sarawin kan me kak sewesehkinkitail mouro, padahk kan, oh kosonned akan en Sises Kraisis.

Pwuhk pahieu kan me Mwomwohdiso kamanahla en wia pwuhk sarawin iei Pwuhk Sarawin, Pwuhken Mormon, Doctrine and Covenants, oh Pearl of

Great Price. Pwuhk pwukat kawehwehda kosonned akan en rongamwahuo oh koasoandi kan me kitail kak sohngeki iren madmadau kan koaros, wiewiakan, oh padahk kan. Pwuhk pwukat kin sewese kitail pwe kitail en wehwehkihla duen mour oh Sapwellimen Sises Kraisis padahk kan oh kasalehda karasaras en aramas akan me ahniki pwoson rehn Koht oh kin kadakadaur Sapwellime kosonned kan.

Sises ketin kaweidekinkitail en rapahki oh sukuhlki ire kan nan pwuhk sarawin (wadek D&C 26:1; 88;118; 2 Timoty 2:15; 3 Nephi 23:1).

Peneinei kan uhdahn anahne patpene rahn koaros oh onopki ire kan nan pwuhk sarawin pwe irail en esehla oh idaweihn Sapwellimen Kauno padahk kan. Pahpa kan uhdahn pahn kihpene tohn arail peneinei nan ansou ehuh me konehng nan rahn akan pwe irail en wadek oh koasoaiia ire kan nan pwuhk sarawin. Tohn peneinei men me kak wadawad uhdahn pahn ahniki ansou mwahu en wadek ire kan sang nan pwuhk sarawin.

Emen tohn peneinei anahne kapakap mwohn ire wadek kan nan pwuhk sarawin eh wadawad oh peki rehn Sahn Nanleng en ketin kapaiada emen emen pwe en kak wehwehki da me wadawadada oh alehda kadehdehpe.

Peneinei kan pil anahne ehukupene arail kapakap mwurin arail wadek ire kan nan pwuhk sarawi.

Ni peneinei kan arail kin wadek oh douloale ire kan nan pwuhk sarawi, arail ineng en men duwehla Sounkomouro pahn laudla oh irail pahn diar popohl kouahlap oh meilei lei nan arail mour kan.

---

### **Pein en Emen oh Emen en Peneinei Kapakap Akan**

Emen emen kitail uhdahn pahn esehla koasoaieng Samatailo Nanleng ni kapakap. E kin ketin poakehng kitail oh kin ketin kupwurki kitail en koasoaieng Ih. E kin ketin kupwurki kitail en kaping kalahngankihong Ih kapai kan me E ketkihong kitailehr oh peki Sapwellime sawas oh kaweid. E pahn ketin sewese kitail ni ansou me kitail kin pekipek Reh. Pali laud en atail kapakap akan kitail kin wia ni atail kin kapangidi moangetail kan oh meirpene ansou me kitail kelepwidi, mwohdedi, de kesihnen.

Kitail anahne tamataman kaweid kesempwal pahieu pwukat ni ansou me atail kin kapakap:

1. Kitail kin tepkihda atail kapakap akan sang ni sakarada pahn kupwur en Samatailo Nanleng: "Samat me Ketiket Nanleng . . ."

2. Kitail kin kaping kalahngankihong Samat Nanleng mehkan me E ketkihong kitail: "Se kaping kalahngankihong Komwi . . ."

3. Kitail kin peki Reh Sapwellime sawas me kitail anahne: "Se patohwan peki Rehmwi . . ."

4. Kitail kin kaimwsangkihla atail kapakap mwaren Sounkoamouro: "Ni lengileng en Sises Kraiss, amen."

Atail kapakap akan sohte anahne idawehn ire pahieu pwukat ansou koaros, ahpw atail tamataman ire pwukat pahn sewese kitail en esehla kapakap. Kitail uhdahn pahn tapiiekihda oh imwiekihla atail kapakap akan ire keieuo oh keimwseklahn ireo ahpw da me kitail koasoaiia nan lukepeo pahn pidada da me kitail pehm me kesempwal. Ekei ansou, kitail pahn anahne wiahki pali laud en kapakap kaping kalahngan ohng Samatailo Nanleng. Nan ekei ansou, kitail pahn men pali laud en atail kapakap en wia pekipektohr ohng Sapwellime sawas.

### **Pein en Emen Emen Kapakap**

Aramas emen uhdahn pahn kelehplwa oh kapakap pak ehu nimenseng oh nisoutik. Pahpah oh nohno kan uhdahn anahne kasukuhlieki seri kan irail en wia pein arail kapakap akan ni ansou me re tepda lokaia. Nohno oh pahpa kan kak kasukuh-

lieki seri kan wiepen kapakap ni arail pahn patepene, keipwekidi oh kaiah-nehkinirail ren alasang ehu lepin lokaia nan ehu ansou. E sohte pahn pwand ah seri kan pahn kakala pein wia arail kapakap.

### **Kapakap en Peneinei**

Ehu ehu peneinei uhdahn pahn wia kapakap en peneinei nan rahn koaros. Tohn peneineio pwon pahn patpene oh keipwekidi ah pahpao ahpw kapakap de peki rehn emen irail en kapakap. Emen emen uhdahn pahn mie ah ansou mwahu en kapakap. Ahn seri tikitik kan arail ansou kak kohieng irail ah pahpa oh nohno ahpw sewese irail. Ansou en kapakap en peneinei wia ansou katapan en kasukuhlieki seri kan duen kapakap oh wiepen padahngki koasoandi en mour me duehte pwoson Koht, aktikitik, oh limpoak.

### **Kapakap Kesempwal Teikan**

Nohno oh pahpa uhdahn pahn sukuhlieki neira seri kan me Koht kin ketin kasikasik en ketin karonge arail kapakap akan ansou koaros. Irail kak kapakap ansou ehu me irail anahne sawas tohrohr de men wia arail kaping kalahngan.

### **Kasarawiala Kisintungoal**

Emen emen pahpa anahne tehk me tohn ah peneinei kaiahn ohng kaping kalahngankiheng Koht arail tungoal kisin mwenge oh peki Reh en ketin kapaiada kisin tungoalo mwohn arail pahn tungoale. Emen emen aramas, iangahki seri tikitik kan, uhdahn pahn mie ah ansou en kapakap. Kapakapki kapaipen kisin tungoal kin sewesehki nohno oh pahpa oh seri kan en esehla kapingkalahngan ohng Samarail Nanleng.

---

### **Soutik en Peneinei Ihmw**

Ehu ehu peneinei uhdahn pahn wia soutik en peneinei ni imwarail pak ehu nan ehu wihk. Peneinei ehu pil kak wadiki aramas emen de pwopdoud ehu. E pil kak seri kan te oh kisherrail kan. Ehu ehu peneinei, sohte lipilipil ma dah, pahn ale kapaipen arail kin patkipene soutik kan en peneinei. Mwomwohdiso kin katohrehla ni soutik en Niehd kan pwe penienei kan en kin kak patkipene soutik en peneinei.

Presidency Keieuo mahsanih: "Se inoukiheng kumwail me kumwail pahn alehdi kapai laud ma kumwail

pahn idawehn kehkehlik en Kauno oh kin wiewia soutik en peneinei kan. Se kin wie kapakapiki pahpa oh nohno kan nan Mwomwohdiso en alehda arail pwukoah en kasukuhlki oh wia mehn kahlamangi kaweid en rongamwahuo ohng neirail seri kan. Koht en ketin kapaiada kumwail pwe kumwail en kak pwerisek ohng nan pwukoah me keieu kesempwal wet" (Message from the First Presidency," *Family Home Evening Resource Book*, [1983], iv).

Ni eh wia peidriark en ah peneinei, pahpao me pahn kin moangehda soahng kan. Ih me pahn kin kaunda de pilada emen tohn peneinei ni ansou en soutik en peneinei. Ih me kin wia padahk de pwelingki ah pwoudo en padahk de seri kan me kakehr wia padahk. Emen emen me koahiekehr uhdahn pahn mie ah ansou en iang wia padahk. Irail seri kan me tikitik kak sawaski pihtih koul, wadek iren pwuhk sarawi, sapeng peidek kan, kolada kilel akan, nehk mehn ketihnain, oh kapakap. Ni ansou me pahpao sohte pahn mie, nohno me pahn uhd moangehda mehkoaros.

Kamwomwadahn wiepen Soutik en Peneinei Ihmwō iei me sansal pah kan:

- Melkahka en ritingada (sang peneinei)

- Kasakas en ritingada (sang emen tohn peneinei)
- Poem de wadepen ire kan nan pwuhk sarawi (sang emen tohn peneinei)
- Padahk (sang pahpa, nohno, de emen seri laud)
- Mwekid en kamwadong (emen tohn peneinei katanga oh tohn peneinei koaros patehng)
- Melkahka en kairala (sang peneinei)
- Kasakas en kairala (sang emen tohn peneinei)
- Mehn ketihnaino

Peneinei ehu kak wia soutik en peneinei ni soangen wiepe tohto. Kemwikid sohte lipilip me kin kahrepene tohn peneinei kin kakehlahla arail limpoak ohng emen emen, sewese, oh kakaranihiraila rehn Sahm Nanleng, oh kahngoangehki irail en weweidwei ni me pwung oh kak wia soutik en peneinei. Karasepen soangen kemwekid pwukat iei wadewadepene iren pwuhk sarawi, koasoakoasoaiapene duen rongamwahuo, ehukipene kadehde kan, miniminkipene doadoahk, koulpene, kohla pikinik, mwadongpene nan peneinei, oh alialu seli nan wasa kan. E pahn kin mie kapakap nan soutik en peneinei koaros.



Padahk kan en soutik en peneinei nan imwarail kak poahsoankida ire kan en nan pwuhk sarawi; mahsen en soukohp akan en imwin rahn akan, kapahrek kan en nan tiepene lap; oh soahng kan me emen lellohnghehr oh kadehde kan. Padahk tohto anahne pidada ipwidi, mour, kasukuhl kan, oh Tompen Dipatail Sang Sounkomouro, *Gospel Principles*, *Gospel Fundamentals*, oh makasihni kan em Mwomwohdiso me audaudki koasoai kan oh iren kehpehse teikan me pid soahng tohto me kak wia kisehn padahk kan en soutik en peneinei ni imwarail.

Iren sawas akan ohng iren koasoakoa-soaipene kan en soutik en peneinei sansal pah:

- Pilahn en komour
- Sapwellimen Sises mour oh padahk kan
- Koluhla
- Kapakap
- Kaisihsol
- Mahsen en Erepit
- Sapwellimen Kauno koasoandi en wiewia pwung oh mehleh
- Wehwehn kamadipw sarawi
- Daiding
- Kasapahl Kalahngan

- Mehleh
- Wauneki Koht oh Kesempwaliki Sapwellime kepikipikda kan
- Kaunop ohng pepdais, kasarawih-pen priesthood, de pwopwoud
- Wadek ire kan nan pwuhk sarawi
- Kasarawiala Rahnsarawi
- Mahkohng mehteikan
- Alehda oh ehukupene kadehde
- Ehukiheng mehteikan pwuhk sarawi
- Nanahkpene poadoapoad en peneinei
- Wehwehkihla oh pwungki mehla
- Apwialiala kahpwal en peneinei
- Apwalih mwohni en peneinei
- Miniminkipene doadoahk en peneineni ni ihmwo
- Kapingki oh perepereniki kemweit (koul)

---

### **Rahn en Kommol oh Kapokon Kesempwal Akan**

Rahn en kommol oh kapokon kesempwal akan me due Krismas, Ihster, kasarawi en sapahldohng priesthoodo, tiepene lap kan, mweseldahn emen

tohn peneinei ohng mission, de ip-widi, pepdais, oh kasarawialahn emen tohn peneinei kak wia ansou mwahu en padahngki padahk mehleh akan rongamwahu mehleh kan en pwuhk sarawi.

---

### **Daiding oh Meirong Kan**

Ansou mwahu ohng nohno oh pahpa kan en wia kasukuhlpen kosonned en daiding oh meirong kan me irail pwain oh toukihda pein arail. Seri kan kin alasang dah me irail kilang arail pahpa oh nohno kan kin wia. Seri kan me kin ale isais en mwohni uhdahn pahn pwainiki arail meirong en 1/10. Emen seri kak ahniki wasahn nahk sent siluh: ehu ohng mehn meirohng en 1/10, ehu ohng mission, oh ehu ohng mehn pwain dipwisou. Ansou koaros me seri kan pahn ale mwohni, irail uhdahn anahne esehla me irail pahn tepte pwil mahs nan wasahn nahk sent en meirong, mwuri ekis nan wasahn nahk sent en mission, ah luhwe kan kolahng nan wasahn nahk sent en netinet.

Ni ansou me e miehler mwohni en daiding me seri kan nekidalahr, pahpa oh nohno kan uhdahn pahn padahkiheng irail en audehda kisin doaropwe en daiding, kiheng nan en-pelop iangahki mwohnio, oh kiheng

de kadarehng enpelopo rehn emen me towe arail pisoprik de branch presidency. Peneinei kan me sohte wia tohn ehu ward de branch anahne kiheng daiding rehn mehmen me wia kaun en priesthood.

---

### **Koasoakoasoaipene Kan ni Ansoun Mwenge**

Ansou en mwenge kan kak wia ansou kesemwpal en koasoakoasoia duen rongamwahu. Seri tititik kan kin pereniki idek oh sapeng peidek kan me pid pwuhk sarawi. Ma irail sehse pasapaeng kan, pahpao de nohno kak ekis sapeng ni mwotomwot oh kasukuhlieki seri kan duen rongamwahu. Kaidehn ansoun mwenge te me anahne iren kapatapat me pid koasoai-pen pwuhk sarawi ahpw ma e pil wiawi pak riau de siluh nan ehu wihk, e kak sewese peneinei en wehwehkihla duen rongamwahu.

---

### **Soai Akan en Ansoun Meir**

Pwehki pali tohto en seri kan arail mwahuki rong Soai Akan en Ansoun Meir, soai kan pil wia ansou mwahu en wia kasukuhlpen rongamwanuo sang ni soaia de wadek koasoai kan sang nan pwuhk sarawi, pwuhk kan me Mwomwohdiso nitingiada, de

soahng kan me aramas wehwehkiher pil kaselel. Koasoai kan me pidada mehlel, miniminpene, oh kadek kin wia kasukuhlpen padahk mehlel akan en rongamwahu.

---

### **Ehukipene doadoahk**

Ansou mwahu tohto ohng kasukuhlpen rongamwahu kin sansalada ni peneinei kan arail kin ehukipene doadoahk ni imwarail kan. Ni ansou en kamwakele ihmw de doadoahk likin ihmw de nan kisin mwetwel, karasepe, pahpa oh nohno kan en kin ku-kaunop ohng ansou mwahu en koasoia duen rongamwahu. Mie seri me kin mwahuki idek peidek. Pahpa oh nohno kan uhdahn pahn ansou koaros kaukaunop ren kihwei pasapeng kan me mengei. Kaping kan me due “Kowe tohn doadoahk mwahu men” de “Kilang depwek lingan ko me Samatail Nanleng ketin kapikadahr,” kak kiheng seri kan pepehm en kaping kalahngan ohng Samatail Nanleng oh koapwoaroapwoar me E me ketin mehlel.

---

### **En Peneinei Koasoakoasoipene Kan**

Pahpah kan kak koasoanehdi tohn peneinei kan nan koasoakoasoai akan en

peneinei kan . Peneinei kan kak doadoahngki koasoakoasoai pene pwukat pwe irail en kosonehdi soahng kan me anahne epwelda, apwaliala kah-pwal en peneinei, koasoaiapene duen mwhoni, wiahda koasoandi en sewese oh kakehlahla emen emen, wia kadehde, oh kapakapiki emen emen. Ehu pwihn kak tuhpene ansou ehu me mie anahnepe. Pahpa kan kak wia arail tuhpene en peneinei Rahnsarawi koaros de me pid te Soutik en Peneinei Ihmw. Wauniki ahn mehtei-kan pepehm oh madamadau kan kin katapan ohng keirda en koasoakoasoipene en peneinei kan.

---

### **Kapeidek Rir Akan**

Me tohto pahpa kan diarada me kin kalap wia kapeidek rir ohng seri kin sewese pahpa kan oh kakaranihiraila rehn neirail seri kan, oh kangoange irial, oh kangoange irail, oh kasukuhliekinirail duen rongamwahu. Soangen koasoakoasoipene pwukat kak wiawi ni mwohmw me wahun de pil soh oh e kak kin wiewiawi poatoapoot.

Pahpao anahne kawehwehieng serio uwen ah limpoakehng oh koapwoaroapoarki, oh serio pahn anahne en pil mie ah ansou mwahu en kaselelda ah pepehm me pid ire sohte li-

pilipil, kahpwal, de soahng kan me e loiengehr. Pahpao uhdahn anahne rong ni keneinei oh uhdahn pahn doadoahngki ahn serio kahpwal akan oh koapwoaroapwoar akan. Pahpao oh serio pahn anahne patkipene kapa-kap. Kahpwal akan me pidada peneinei teikan me kin pwarada nan soangen koasoakoasoaipene due met kak uhd epwelda ni soutik en peneinei me kohkohdoh.

---

### **Mwekid Akan en nan Peneinei**

Pahpao uhdahn pahn kin koasoanehdi ansou da me peneinei unsek

pahn kak patpene oh wia soahng kan. Pikinik, kohla camp, doahk en peneinei, doahk en ni ihmwo oh likin ihmwo, pampap, alialuseli, oh kilel mwekid oh soahng teikan me kaperen wia ekei soahng tohto kan me peneinei kan pahn kin pereniki patkipene.

Peneinei ehu me kin pereniki patkipene mwekid kan pahn pehm poakpene laud oh onepek mwahu. Seri kan pahn perenikihla mehleh rong arail nohno oh pahpa kan oh idawehn arail kaweid ma irail pehm me irail karanih pahpao oh nohno. Pahpa oh nohno kan pahn kakala wia kasukuhlpen rongamwahuo me idipek.

# Pwukoah me Keieu Kesempwal kan en Priesthood

---



Misin Kapwukoah en Mwomwohdiso en Kauno iei en sewese aramas koasos pwe irail en kohdo rehn Kraiss. Peneinei kan kak apwaliaala pwukoah wet ma irail:

1. Sewesehki pein irail oh ahn arail peneinei anahn akan en paliwar oh palingehn oh pil sewese kaitarala anahn en aramas teikan.
2. Ehukiheng mehteikan duen rongamwahuo.
3. Tehk pwe tohn peneinei kan en alehdi tiahk sarawi kan oh sewesehki kisherail teikan me melahr kapai pwukat.

## **Anahn en Palingehn oh Paliwar**

### **Anahn en Palingehn**

Ire me sansalehr nan pwuhk en kaweid wet, "Kasukuhlki Rongamwahuo ni Ihmwo", audaudkihda iren kaweid kei me pid duen peneinei kan arail pahh kak sewesehda anahn akan en palingenirail.

### **Anahn en Paliwar**

Peneinei kan en kehleki pein irail pwe irail en kak apwalih pein arail anahn en paliwar kan oh sewese mehteikan. Pwe emen en kak kehleki pein ih, tohn peneinei kan pahh uhdahn pwe-

risek en doadoahk. Doadoahk iei me paliwar, lamalam, oh palingehn kak wiahda. Iei wasa me wia ahl ohng kada, peren, likih pein ih, oh kehleki. Pahpa oh nohno kan pahn uhdahn koadoahke irail en kak kehleki pein irail oh uhdahn anahne kasukuhlieki neirail seri kan ren kahlamangih irail. Kehleki pein irail pahn kiheng irail en kak sewese aramas teikan me mi nan apwal.

Pahpao oh nohno me kin koadoakehda ara peneinei anahn akan en paliwar. Ira me kin tehk pwe ahn peneinei wasahn kousoan en mwakelekel, mwenge en mwahu, epwelpen soumwahu oh ngih medek, kaweid ohng kasukuhl, wiepen kasukuhlpn katanga sawas en mwohni, oh, ma kak, kaiahn en wiepen poadokedi ekei pein kenerail mwenge. Pahpa oh nohno kan uhdahn pahn kasukuhlieki neirail seri kan wiepen kaunopada kisin mwenge oh wiepen nekidala pwe en pil kak doadoahk mwuhr.

Nohno oh pahpa kan uhdahn pahn anahne doadoahk laud pwe irail en kak koadoakehda anahn en paliwar pwukat. "Oh kumwail sohte pahn kin mweidohng noumwail serikan en man mwengehda de kilisouda" (Mosiah 4:14). Nohno oh pahpa kan uhdahn pahn koasoanehdi oh kaunopada duen ara pahn koadoakehda en

peneinei anahn akan nan ansoun soumwahu, kahpwal me soh-kesikpe (disaster), sohte doahk en mwhoni, de kahpwal teikan. Ma pahpao apwaliki sewese ahn ah peneinei anahn akan en paliwar oh ma irail teikan nan peneinei sohte kak sawas, e kak repen sawasla rehn kaun kan en priesthood.

Seri kan kak sewese koadoakehda ahn arail peneinei anahn akan me pid paliwar sang ni arail pahn sewesehki pahpa oh nohno ara doadoahk, nantiheng arail sukuhl, apwalih mwahu arail likou oh soahng teikan me arail, apwahpwalih pein paliwararail oh imwarail en mwakelekel oh soan, oh kolokol roson mwahu.

Tohn peneinei kan uhdahn pahn kalaudehla arail koahiek en wadawad, nting, oh wia tepdahn wahntuhke, oh uhdahn pahn rapahki ahl ohng ansou mwahu en kak loalekengla oh kalau-dehla arail koahiek kan. Irail uhdahn pahn peikieng mahsen en erepit oh tungoale mwenge kan me wia mehn karoson. Wasa me kak, peneinei kan uhdahn pahn nekidala tehte kan, me pahn ohng ehu pahr de uwen me kak, en dipwisou kan me anahn ohng kolpen mour. Irail kan me towe peneinei uhdahn pahn tetehk pwe ede mie pweipwand me sohte konehng, nanahk ohng rahn akan me kohkohdo, kapwaiada arail pwukoah koaros, oh

doadoahngki ni keneinei uwen me mie reh rail, ni sohte wiakau.

Nohno oh pahpa kan uhdahn pahn kasukuhlieki neirail seri kan ren sapan ohng mehteikan. Kerenieng aramas koaros kak sapankihwei mehкот, sohte lipilipil ia uwen me mie reh rail. Ehu wiepen sewese irail kan me mie arail anahn iei kaisihsol nan ehu ehu sounpwong oh kin kihda meirong kan en kaisihsol me kin doadoahk ohng kamwengpen irail kan me duhpek, wiahieng imwen irail kan me sohte imwarail, kalikawi irail kan me sohte arail likou, oh sewesehda irail kan me mi nan kahpwal. Kitail kin kasalehda atail limpoak ohng Kauno sang ni atail kin sewese mehteikan. E ketin mahsanih, “Kumwail en ese pwe soahng karos me kumwail wiahiong emen riei me tiktik pwukat, ngehi me kumwail wiahieng ie” (Madiu 25:40).

---

### **Kalohki Rongamwahuo**

Kauno oh soukohp akan en imwin rahn akan padahngkier me tohn Mwomwohdiso koaros ahniki pwukoah en kalohki rongamwahuo ohng aramas teikan. “E wia pwukoah en aramas koaros me pakair lelohngehr en pil kalelehki mehteikan” (D&C 88:81). Alma, emen soukohp en nan

Pwuhken Mormon, kawehwehda me ni ansou me kitail pepdaislahr kitail uhdahn pahn inengieng “uhkihda atail wia sounkadehde kei en Koht nan ansou koaros, oh ni soahng koaros, oh nan wasa koaros” (Mosaiah 18:9).

Tohn peneinei kan uhdahn pahn wia arail kak koaros en sewese kisehrtail teikan, kempokepah rail kan, oh mehn mperail kan ren wehwehkihla rongamwahu en Sises Kraiss oh kapai kan me e kak ketin sewesehki arail mour kan. Sang ni ehukupene duen rongamwahuo, pahpa oh nohno oh seri kan kak kakehlahla arail kadehde kan oh uhselahng irail teikan kapai kan en rongamwahuo. Peneinei kan kak:

- Wia mehn kahlamangih mwahu sang ni kin peikieng kosonned akan koaros, (kilang Madiu 5:16)
- Kapingki arail wia tohn Mwomwohdiso (wadek Romans 1:16), oh kehsehki aramas teikan me irail wia towe kei.
- Idek rehn irail kan me re ese ma irail men wehwehkihla duen Mwomwohdiso.
- Peki rehn Kauno en ketin sewese oh pilada peneinei ehu de emen emen me onopadahr rong duen rongamwahuo.

- Kepehsehieng peneineio de aramaso duen Mwomwohdiso ni soangen wiepe ehu, me duehte lukeirail ohng ehu soutik en peneinei de ohng ehu tuhpane de kemwekid en Mwomwohdiso, kiheng irail pwuhk kan en Mwomwohdiso de soahng kan me ntingda me wia mehn wadawad, de koasoakoasoahiang irail duen kapai kan en rongamwahuo.
- Lukelahng peneineio de aramaso ni imwarail pwe mesneri kan en padahkohng irail.

Pahpa oh nohno kan kak sawas oh ehukiheng mehteikan pwuhk sarawi sang ni arail pahn kaunopada pein irail oh neirail seri kan en wia sawas ni rahn koaros nan mission an. En kak kaunopada seri kan, ahpw mehlel neirail pwutak kan, pahpa oh nohno kan uhdahn pahn wia kasukuhlpen duen rohngamwahuo ni imwarail, kasukuhlpen ire kan nan pwuhk sarawi oh kapakap ohng emen de peneinei, oh kin koasoakoasoaiia duen pwukoah kan oh kapai kan me kin kohsang ni ehukiheng mehteikan duen rongamwahuo. Irail kak kasukulieki neirail seri kan en nekidala mwohni me ohng mission, ngoangki doadoahk, kehleki pein irail, oh limpoak ohng oh papah aramas teikan.

### **Tiahk Sarawi kan en Nan Tehnpas Sarawi ohng me Momour oh Me Melahr akan**

Nan tehnpas sarawi kan, towe me warohng kan kin alehda tiahk sarawi kan oh wiahda keinekerail inou sarawi kan rehn Koht ohng pein irail oh ohng keinekerail kan me melahr. Nan ansou kan me konehng, pahpao oh nohno koaros uhdahn pahn alehdi kisin likou en mweimwei pwarala ni tehnpas sarawi sang rehn ara kaun kan en priesthood oh pwarala ni ehu tehnpas sarawi pwe ira en alehdi pein ara tiahk sarawi kan. Ma ira sohte pahn kakala ni ehu tehnpas sarawi, ira uhdahn pahn wie momourki ara warohng alehda kisin likou en mweimwei en pwarala ni tehnpas sarawi.

Peneinei kan ahniki pwukoah sarawi en tetehk me tiahk sarawi en nan tehnpas sarawi wiawiheng keinekerail kan me melahr ni arail saik ale soahng pwukat. Tohn mwomwohdiso koaros me alehier pein arail tiahk sarawi kan uhdahn kin anahne pwurupwurala nan tehnpas sarawi ma ansou, wiepe, oh mengei en tehnpas sarawi mie ohng irail pwe irail en wia tiahk sarawi kan ohng keinekerail kan me melahr.



Pahpa oh nohno kan uhdahn pahn nahkpene ntingdi en ketemenpen kemwekid kesempwal akan nan arail mour oh nan mour en neirail seri kan, kapatahieng kisinlikou en kapai kan, pepdais kan, kasarawi kan, pwpwoud kan, oh mehla kan; kisinlikou kesempwal akan; kilel akan; rohng tipwati-pwada kan; oh dipwisou me due mewukat. Irail uhdahn pahn kih-

pene pein koasoaparail kan oh kahngongehki emen emen tohn peneinei en nekinekid koasoaiopen pein ih. Irail uhdahn pahn sewese seri tikitik kan oh tapiada koasoaiopen pein irail.

Peneinei kan uhdahn pahn kihpene iren kepehse me pid keinekerail kan me melahr oh wiahkihda poadepen peneinei.

# Kaiahn en Kawekaweid

---



Pahn kaweid en mission, district, de kaun kan en stake, kworem oh pwihn en kaun en priesthood pahn kasukuhlieki emen emen pahpa me re moangehda en wehwehki oh wia pwukoah kesempwal siluh kan en priesthood nan ah peneinei. Kaun kan en priesthood uhdahn pahn kasukuhlieki

emen emen pahpa wiepen kaweid ah peneinei ni mwekid me mwomwehngete ehu pwihn en Mwomwohdiso. Ma peneineio sohte towe ehu stake de ward, misino, de districto, de kaun kan en stakeo pahn anahne tehk me pahpa kan ale kasukuhlpn arail pwukoah kan oh kapwaiada.

# Peneinei ni eh wia Unit en Mwomwohdiso

---



Ekei peneinei kan sohte wia tohn ehu pwihn, branch, de ward. Sang ni *mweimwei en mission, district, de stake presidente*, soangen peneinei pwukat uhdahn pahn kin wia sarawi en kaudek en Rahnsarawi ni imwarail ko. Ni anou me pahpao kolokol pwukoah en priesthood, peneineio pahn doadoahk duehte ehu unit en Mwomwohdiso. Pahpao de emen me kolokol priesthood kak kaunopada oh kapaida kamadipw sarawi ma e warohng, wia emen samworo nan Aaronic Priesthoodo, de kolokol Melkisiridik Priesthood oh *alehdi mweimwei sang rehn ah kaun kan en priesthood*. Mehmen me kolokol priesthood

kak kihpeseng kamadipw sarawi. Kaweidpen apwalih kamadipw sarawi mi nan pali 21–22 en pwuhk en kaweid wet.

Sarawi en kaudek en Rahnsarawi uhdahn pahn mengei, wahun, oh kaneinei. Kaudeko kak wiawihkihda:

1. Koul en Ritingada
2. Kapakap en Ritingada
3. Kapaida oh kihpeseng kamadipw sarawi
4. Ehu rehn soahng pwukat me sansal pah de tohtohsang:

- Ehu de riau koasoai de kadehde kan me mwotomwot.
- Wadepen iren pwuhk sarawi oh koasoakoasoaipene ni duen peneinei
- Ehu padahk sang rehn emen tohn peneinei

5. Koul en ritingedi

6. Kapakap en kairala

Nan koasoanepen sarawi en kaudek en Rahnsarawi, papao uhdahn pahn rapahki oh idawehn kaweid en Ngehn en Kauno. Aramas akan me mi nan Pwuhken Mormon kasalehda wiepen soangen kaudek wet: “Oh arail pokon akan kin ale kaweid sang ni mwomwohdiso nin duwen doadoahngkan en Ngehn Sarawio, oh sang ni manaman en Ngehn Sarawio, pwe ni duwen Ngehn Sarawio kin ketin kahluwa irail sohte lipilipil ma ong ni padahk, de ong ni kaweid, de ong ni kapakap, de ong ni pekipek, de ong ni koul, iei duwen me e kin wiawi” (Moroni 6:9).

Peneinei uhdahn pahn doadoahngki ire kan nan pwuhk sarawi pwe en wia iren kawei kesempwal. Patehng met, irail kak doadoahngki kapahrek en nan tiepene lap akan, *Gospel Fundamentals*, *Gospel Principles*, pwuhk en mesneri kan, makasih kan

en Mwomwohdiso, oh pwuhk teikan me Mwomwohdiso kin ntingiada oh dipwisou kan me mi ni ngihl oh kilel.

Ma sohte emen nan peneinei kasarawiheng priesthood, pahpao de nohno kak kihpene peneinei pwe irail en koulki koul en sarawi kan, sukuhlki ire kan nan pwuhk sarawi, kapakap, oh paiahnpene ohng Sahn Nanleng. Ahn peneinei kaun en priesthood me pilipldao me pahn koasoanehdi ansou kan me konehng paneinei en ale kamadipw sarawi.

E uhdahn pahn mie da me Nohno oh pahpa kan pahn kin wia nan wihk koaros, me duehte alialuseli, kohla pikinik, kilang kilel mwekid mwahu kan, pwarek arail peneinei teikan, soangoasoangen mwadong kan, koasoandi kan en koul, oh pampap.

Peneinei kan me sohte wia tohn ehu ward de stake uhdahn pahn kiheng arail daiding meirong en kaisihsol kan oh tou teikan rehn kaun en priesthood me pilipildao.

Peneinei kan sohte kin kadarohng Mwomwohdiso pakairpen doadoahk ni nting, ahpw, nan wasa sohte lipilipil, pahpao uhdahn pahn kin tuhong kaun en priesthood pilipildao ni kapeidek rir nan erein sounpwong siluh koaros pwe en pakairki iren ah peneinei.

# Tiahk Sarawi Kan oh Kapai Kan en Priesthood

---



Tiahk Sarawi kan en priesthood wia tiahk sarawi kei me Kauno ketin ketkihdo oh kin wiawi sang ni mweimwei en priesthoodo. Kasarawi kan sang priesthood kin wiawi sang ni mweimwei en priesthoodo ohng mehn kamwahwiala soumwahu, kansenamwahu, oh kangong. Tohn Mwomwohdiso me kin wia tiahk sarawi kan oh kapai kan uhdahn pahn kaunopada pein irail sang ni arail pahn momourki kehkehlik kan en rongamwahuo oh kin loaloapwoatieng kaweid en Ngehn Sarawi. Irail uhdahn pahn wia ehu ehu tiahk sarawi kan oh kasarawi kan ni wiepe me wahun oh idawehn koasoandi pwukat:

1. E uhdahn pahn wiawi ni Lengileng Kapai en Sises Krai.
2. E uhdahn pahn wiai sang ni manaman en priesthoodo.
3. E uhdahn pahn wiawi ni wiepe me pwung kan, me duehte doadoahngki lokaia me koasoandi oh doadoahngki leh me kasarawilahr.
4. E uhdahn pahn alehdi mweimwei sang rehn kaun en priesthood pili-pildao me kolokol koasoandi pwung kan, ma konehng.

*Tiahk sarawi kan me anahne kaun en priesthood rahn kamanahla iei kiheng eden seri kan oh kapai irailda, wia pepdais kan*

*oh kasarawi en towehla kan, pwildien en priesthood oh kasarawi ohng ohpis kesempwal en priesthood, kapaida oh kihpeseng kamadipw sarawi oh kasarawi sousou kan.*

Kapwukoah oh kapai kan me sansalehr nan pali wet pahn sewese pahpa kan ren kak wia pwukoah kan en ppeidriark nan arail peneinei kan.

---

### **Kiheng Eden Seri kan oh Kapai Irailda**

Emen emen tohn Mwomwohdiso en Krai me naineki seri pahn kahrehdo neirail seri kan rehn irail elder kan, mwohn tohn Mwomwohdiso, me pahn pwilikihdi pehrail kan pohn seri kan ni mwaren Sises Krai, oh kapaida seri kan ni mware (kilang D&C 20:70). Ohng ni pwung en koudial wet, irail kan me warohng te, me kolokol Melkisiridik Priesthood, me kak kiheng eden seri kan oh kapaida. *Tiahk sarawi en kiheng eden seri kan oh kasarawiala irail anahne alehdi mweimwei sang irail kan me kaun.*

Nan ansou en kapai en seri, ohl akan me kolokol Melkisiridik Priesthood pahn pwononpwonpene oh kihdieng pehrail kan pohn serio. Aramas me pahn wia kasarawio ahpw:

1. Likweri Sahn Nanleng.

2. Koasoia me kapaio wiawi sang ni mweimwei en Melkisiridik Priesthood.
  3. Kiheng serio ehu ahd.
  4. Wia kasarawi en priesthood ni kaweid en Ngehno.
  5. Kairala ni lengileng en Sises Krai.
- 

### **Pepdais**

*Sang ni kaweid en me ahniki manaman en kaunda, priest men me warohng de ohl emen me kasarawihengehr Melkisiridik Priesthood kak pepdaisiala aramas. Duen wiepe, e pahn:*

1. Kesihnen nan pihl iangahki aramas me pahn pepdaiso.
2. Ohng onepek mwahu oh epwel ke-neinei, koleki pali maun en kumwut en pehn aramaso pali meing en peho. Ohng onepek mwahu oh epwel keneinei, aramas me wia pepdaiso pahn koleki pelimeing en peho pali maun en kumwut en pehn aramaso; arama pepdaiso pahn koleki pali meing en peho pali meing en kumwut en pehn aramas wia pepdaiso.
3. Kolada pali meing en peho lao lel ni mwomwen keimw pahieu.

4. Nda eden aramaso unsek oh koasoia, "Sang ni manaman en Sises Krai, I pepdaisihukala ni Lengileng Kapai en Sahn, oh Naho, oh Ngehn Sarawi. Amen " D&C 20:73).
5. Aramaso en kolekipene pein tumweo kumwut en peh pali maun ohng kamwahupe; aramas me wia pepdaiso pahn pwiliki peh pali maun pohnsewen aramasteio oh kaduedi douluhl aramaso, iangahki ah kapwat koaros.
6. Sewesehda aramaso sang nan pihlo.

Priest riemen de ohl me wia Melkisiridik Priesthood pahn kin kadehde ehu ehu pepdais pwe en kin wiawi ni pwungio. Pepdaiso uhdahn pahn kapwurupwurieng ma mahsen kan sohte daur pwungio me kileledi nan Doctrine and Covenants 20:73 de ma mie wasa ni paliweren aramaso de ah kapwato sohte duhla unsek nan pihlo.

---

### **Kasarawi en Towehla**

Aramas emen kin kasarawiala en towehla mwurin eh pahn pepdaisla (tehk D&C 20:41). *Sang pahng kaweid en pisoprik de branch presidency*, emen aramas de tohtohsang me kolokol Melkisiridik Priesthood iei me warohng

wia kasarawi wet. Mehmen me wia kasarawi wet pahn:

1. Nda eden aramaso unsek.
  2. Koasoia me tiahk sarawio wiawi sang ni manaman en Melkisiridik Priesthood.
  3. Kasarawiala aramaso en wiahla tohn Mwomwohdiso en Sises Krai en Souleng en Imwin Rahn Akan.
  4. Kihong aramaso kisakis en Ngehn Sarawi ni eh koasoia, "Alehda Ngehn Sarawio."
  5. Kihda kapai en priesthood sang ni kaweid en Ngehno.
  6. Kairala ni lengileng en Sises Krai.
- 

### **Pwildien ohng Priesthood oh Kasarawiheng nan ohpis kan en Priesthood**

Pisop de branch presidente me pahn tetehk pwildien Aaronic Priesthood oh kasarawi kan ohng ni ohpis kan en dihken, teacher, oh priest. Stake Preseidente de district presidente me kin tetehk pwildien Melkisiridik Priesthood oh kasarawi ohng ohpis kan en elder oh samworou lapalap. Pwe en pwilikihdi pahng emen priesthoodo de kasarawiala emen aramas ohng ehu ohpis en priesthood, ohl rie-

men de tohtohsang me kolokol priesthood manamano oh *me alehdi manaman sang irail kan me wia kaun lapalap* pahn pwilikihdi pehrail ko ni keneinei pohn moangen aramaso. Eri aramas me wia kasarawio ahpw:

1. Nda eden aramaso unsek.
2. Kasalehda manaman me kasarawio poahsoandahsang.
3. Kihong aramaso Aaronic de Melkisdik Priesthood, ma saikinte kohieng ih (Aaronic de Melkisdik Priesthood).
4. Karasawiala aramaso ohng ehu pwukoah nan Aaronic de Melkisdik Priesthood oh kiheng pwuhng kan, manaman kan, oh mweimwei me ohpiso ahniki.
5. Kihla en priesthood sang ni kaweid en Ngehn Sarawi.
6. Kairala ni Lengileng en Sises Krai.

---

### **Kamadipw Sarawi**

Kamadipw sarawi wia tiahk me inen sarawi mehlel. Tungoale kamadipw sarawi kin kiheng aramas emen ansou mwahu en kak tamataman Sapwellimen Sises Krai mouro, padahk kan, oh tompen dihp. E wia ansou en weliakapwih inou kan me

emen emen wiadahr rehn Koht ni ansou me e pepdaisla. (Tehk Mosaia 18:8–10).

Aramas koaros me kin kaonopada; kasarawiala; de kihpeseng kamadipw sarawi kin apwalih tiahk sarawi wet ohng aramas teikan ni arail wiliandi Kauno. Aramaso uhdahn pahn wia ah pwukoaho ni keneinei oh wahun. E uhdahn pahn kapwatada mwahu, mwakelekel, oh kapwat ni mwohmw me sohte kaineng. Mwomwen aramaso uhdahn pahn kasalehda sarawien tiahk sarawio.

Irail kan me pahn kin kapaiada kamadipw sarawio uhdahn pahn pwilikidieng sansar en pilawao (de sansaroko) nan dahl mwakelekel pohn kisin tehpel me pil mwakelekel oh pil uhdahn pahn pwilikidieng kep kilahs (de mehn audaud sohte lipilipil) akan me audaudki kisin pihl pohn tehpele, ehu kilahs pahn dokehte emen aramas me pwarodo. Irail uhdahn pahn pwainikihdi pilawao oh pihlo likou me pwetepwet oh mwakelekel. Irail kan me pahn kapaiada kamadipw sarawio uhdahn pahn kihsang mahs pweinen pilawao mwohn arail pahn kapisetikiedi oh kasarawiala, oh pahn uhdahn pwurehng pwainpene dahlo mwurinte pilawao eh nehnehier. Irail pil pahn kihsang pweinen pihlo mwhon eh



pahn kasarawihla oh pil pwurehng pwaindi mwurinte pihlo eh nehne.

Aramas me pahn kapaida pilawao pahn keipwekidi oh wia kapakap en kamadipw sarawi en pilawao. Pilawao eri nehnehieng irail kan me pwarodo. Aramas me pahn kasarawiala pihlo pil pahn keipwekidi oh wia kapakap en kamadipw sarawi en pihlo. Pihlo ahpw pahn nehnehieng irail kan me pwarodo. Kamadipw sarawi kin wia-wiheng tohn Mwomwohdiso kan, oh sohte mehkot kak wiawi me pahn irehsang aramas teikan me sohte towe en dehr iang ale.

Kapakap akan en kamadipw sarawi uhdahn pahn wiawi ni sansal, pwung, oh wahun. Ma aramas me wia kapakap en kamadipw sarawio sapwungala ni ah wadawado, e uhdahn pahn pwurehng kapwungala.

Metehrt iei kapakap en pilawao:

“Maing Koht, Sahn Soutuk, se patohwen peki rehmwi ni mwar en sapwellimomwi Ieros, Sises Kraiss, en ketin kapaiiada oh kasarawiala pihl wet ong war koaros me pahn patohwen tungoale, pwehn wia mehn katamanpen ntahn sapwellimomwi Ieroso, me kepwilipwilkidier pwehki irail; pwe irail en patohwen kadehdehiong komwi, Maing Koht, Sahn Soutuk, me re pahn patohwen tamatamaniki ih

ansou koaros, pwe sapwellime Ngehn en ketiket rehrrail. Ahmen” (D&C 20:77; pil kilang Moroni 4).

Metehrt iei kapakap en pihlo:

“Maing Koht, Sahn Soutuk, se patohwen peki rehmwi ni mwar en sapwellimomwi Ieros, Sises Kraiss, en ketin kapaiiada oh kasarawiala pilawa wet ong war koaros me pahn patohwen tungoale, pwehn wia mehn katamanpen war en sapwellimomwi Ieroso, oh kadehdehiong komwi, Maing Koht, Sahn Soutuk, me pein irail men patohwen ale mwar en sapwellimomwi Ieroso, oh patohwen tamatamaniki ih ansou koaros oh kapwaiada sapwellime kosonned akan me e ketikiong irailier; pwe sapwellime Ngehn en ketiket rehrrail ansou koaros. Ahmen” (D&C 20:79; pil kilang nan Moroni 5).

Kamadipw sarawio uhdahn pahn kohsang sang pohn tehpele ni ansou mwadang mwuring mihtingo. Pilawa me luhwehdi kak uhd wiahla mehn tungoal.

Irail priest kan me towe Aaronic Priesthood oh irail kan me kolokol Melchizedek Preisthood te me kak kasarawiala kamadipw sarawi. Dihken kan, teacher kan, oh priest kan nan Aaronic Priesthood me kak kihpeseng kamadipw sarawi. *Kasarawiala oh kihpeseng nehk kamadipw sarawi kan kin*

*anahne alehdi mweimwei sang rehn irail kaun kan me pwukoahki apwapwalih.*

---

## **Kapakapki me Soumwahu**

### **Kasarawiala Leh**

Ohl emen (de tohtohsang) me kokokol Melkisdik Priesthood me kin kasarawiala leh en olive mwakelekel ohng mehn wia doahdoahk sarawi en keie irail kan me soumwahu oh mi nan kahpwal. E (de irail) pahn:

1. Kol deupen leh en olive me mwakelekel.
2. Kosomwosomw rehn Samatail Nanleng.
3. Koasoia me e wiewia doadoahko pahn manaman en Melkisdik Priesthood.
4. Kasarawiala leho (kaidehn deupeo) oh katohrala ohng mehn keiehdi aramas akan me soumwahu oh me ahniki kahpwal.
5. Kairala ni lengileng en Sises Kraiss.

### **Keiehdi me Soumwahu**

Aramas me kolokol pwukoah en Melkisdik Priesthood te me kak keiehdi aramas me soumwahu de mi nan kahpwal. Me kin kalapw wiawi, aramas riemen de silimen me kin wia

keio, ahpw emente pil kak kelehpw wia. Ma sohte leh me kasarawilahr, aramas me kolokol pwukoah en Melchizedek Preisthoodo kak wia kapai pahn manaman en priesthoodo.

Pahpa men me kolokol pwukoah en Melkisdik Priesthood me pahn pwukoahki apwaliheng irail kan me soumwahu nan ah peneinei. E kak pekihda rehn emen me kolokol pwukoah en Melkisdik Priesthood en sewese ih.

Mie pali riau nan wiepen apwaliheng soumwahu doadoahk wet: (1) keiehkidhi aramas leh oh (2) katengehdi kei sarawio.

*Keiki leh.* Emen aramas me kolokol pwukoah en Melkisdik Priesthood pahn keiehdi aramas soumwahu. Pwe en wia kei wet, aramaso pahn:

1. Kadingedieng ekei dingiding en leh kasarawilahro pohn moangen aramaso.
2. Pwilikihdieng peh ko, dehr idang, pohn moangen aramaso oh nda eden aramaso.
3. Nda me e keie aramaso pahn manaman en Melkisdik Priesthood.
4. Nda me e wiewiekeiki leh me kasarawihengehr mehn kamwahualia me soumwahu kan.

5. Kairala ni lengileng en Sises Kraiss.

*Katengehdi aramas keidio.* Me kin wiawi, aramas riemen de tohtohsang me kolokol Melkisdik Priesthood pahn kihdieng pehrail ko, ni marahra, pohn moangen aramas me soumwahu. Emen irail eri katengehdi kei sarawio. Me kin wiawi en, aramas pahn:

1. Nda eden aramaso soumwahuo ni unsek.
2. Nda me e katengehdi keio sang ni manaman en Melkisdik Priesthood.
3. Katengehdi wiekeio.
4. Kapakap ni kaweid en Ngehno.
5. Kairala ni lengileng en Sises Kraiss.

---

### **Kapai en Pahpa oh Kapai Teikan en Kapohl oh Kaweid**

Kapai kan me sang rehn pahpa oh kapai en priesthood teikan kin wiawi pwe en wia mehn kaweid oh mehn kalohmwat pahn kaweid en Ngehno.

Pahpa men me kolokol Melkisdik Priesthood kak wiahieng nah seri kan kapai kan me kin sang rehn pahpa. Soangen kapai pwukat pahn kak sawas mehleh ni ansou me seri kan pahn mwesel kohla sukuhl, kohla wia mission, pwopwoudla, iangahla sounpei,

de loieng soahng kan me soh-kesi-kipe. Kapai pwukat kak wia mehn kakehlail ohng ehuh peneinei. Peneinei ehuh kak kilelehdi ehuh kapai kan me kin sang rehn pahpa en wia nein peneinei *rekoht kan*, ahpw e sohte kak nekinekla nan *rekoht kan* en Mwomwohdiso. Pahpa oh nohno kan uhdahn pahn kahngongehki seri kan ren peki kapai kan me kin wiawi sang rehn pahpa ni ansou me re kin anahne.

Ohl warohng kan me kolokol Melkisdik Priesthood pil kak wia kapakap en kansenamwahuiala oh kaweid ohng arail pwoud kan, tohn peneinei laud, oh aramas teikan me pekipeklahng irail.

Duen wia kapai kan me kin sang rehn pahpa de soangen kapai teikan me wia mehn kansenamwahuiala oh kaweid, pahpao oh emen ohl de tohtohsang me warohng oh kolokol Melkisdik Priesthood pahn kanaiedi pehrail ko pohn moangen aramas me kapai wiawihengo. Sohte leh anahn. Aramas me wia kapaio eri:

1. Nda eden aramaso ni unsek.
2. Nda me e wiewia kapaio sang ni manaman en Melkisdik Priesthood.
3. Kapakap ni kaweid en Ngehno.
4. Kairala ni lengileng en Sises Kraiss.

## Kasarawihpen Seridi

Aramas me kin wia kasarawihpen wasahn sang ni seridi uhdahn pahn towe Melkisdik Priesthood oh *pahn uhdahn ale manaman sang lapalap en priesthood me katanga kaudeko*. En kasarawi seridi, aramaso pahn:

1. Likwerih Sahn Nanleng.
2. Nda me e kasarawi wasahn sang ni manaman en Melkisdik Priesthood.
3. Kasarawiala oh kapaiada wasahn seridio pwe en wia wasahn kommoaldi ohng paliwar me mehla.

4. Ma me konehng, kapakapki me wasao pahn wiahla wasa sawari oh si-lehdi lao lel ansou en iasada.

5. Peki Koht en ketin kaloalte mwahurih peneineio oh pil koasoia soahngteikan sang ni kaweid en Ngehno.

6. Kairala ni lengleng en Sises Krai.

Ma peneineio utung, aramas emen (konehng emen me kolokol Melkisdik Priesthood) kak kapakap ni sousouo ah kaidehn wia kapakap en kasarawiala wasahu seridio.



THE CHURCH OF  
JESUS CHRIST  
OF LATTER-DAY SAINTS

